

■ LIA RUMANTSCHA

Rumantsch en las scolas medias ordaifer il territori rumantsch

(cp) L'Institut Otalpin Ftan ha stuì serrar las portas. Per l'Engiadina Bassa è quai ina gronda perdita. Ussa dovri ideas creativas per il diever alternativ da l'areal. Tenor la Lia Rumantscha ston las scolaras ed ils scolars rumantschs da l'Engiadina Bassa avair er en l'avegnir la pussaivladad da visitar lecziuns rumantschas en las autras scolas medias. Serrar las portas da l'Institut Otalpin Ftan è or dal puntg da vista economic ina gronda perdita per l'Engiadina Bassa. Fitg difficila è la situaziun per las scolaras ed ils scolaras sco era per las emploiadas ed els emploiads pertutgads. Il cussegl d'administraziun che ha inizià a moda bain ponderada la mesira drastica da serrar la scola ha gia preschenta emprimas ideas per dievers alternativs da l'infrastructura existenta. «Igl è impurtant ch'il diever alternativ futur da l'areal saja economicamain raschunaivel», precischa Urs Cadruvi, il secretari general da la Lia Rumantscha. «Pertge che mo in curn economicamain stabil pussibilitescha la cuntinuitad dal rumantsch en questa regiun», explitgescha Urs Cadruvi.

Dapli purschidas en rumantsch en las scolas medias

Ultra da las sfidas economicas resultan da la situaziun a Ftan era dumondas politic-

linguisticas. Tenor la Lia Rumantscha ston las scolaras ed ils scolars rumantschs da l'Engiadina Bassa avair er en l'avegnir la pussaivladad da visitar lecziuns rumantschas en las autras scolas medias, e quai en almain il medem rom sco quai che Ftan ha purschì enfin uss. Cas cuntrari daventa tranter auter pli e pli critica la problematica da pudair furmar avunda personas d'instrucziun rumantschas per la regiun. L'Academia Engiadina a Samedan però er autras scola che offran gia lecziuns en rumantsch pudessan ponderar da porscher rumantsch en lur scola resp. da schlargiar la purschida. La nova lescha davart las scolas medias garantescha in sustegn finanziel correspondent. Per l'ina n'èn ils intschess cumpigliads da las scolas medias privatas betg (pli) limitads regiunalmain. Per l'autra vivan en l'entir chantun famiglias rumantschas che nizegiassan gugent ina purschida rumantscha sin il stgalim da la scola media. Necessaria è ina midada da paradigma che promova ina purschida rumantscha opziunala er en scolas medias privatas ordaifer il territori rumantsch. Concretamain signifitga quai che per exempel la Scola media evangelica Aschera duess porscher opziunalmain ina matura bilingua rumantsch-tudestga.

Il svilup economic po rinforzar il rumantsch

Per promover la lingua è il svilup economic d'ina regiun ina spada a dus taglioms. I dat avunda exempels che mussan co ch'il rumantsch è vegnì chatschà a chantun en il decurs dal svilup economic. Ina basa economica solida è da l'autra vart però in factur decisiv per interrumpere la spirala negativa dal svilup demografic e da la depopulaziun da las regiuns che han per consequenza ina stagnaziun economica che indeblescha er il rumantsch. Ina basa economica solida pussibilitescha la cuntinuitad dal rumantsch en l'Engiadina Bassa. Perquai sustegna la Lia Rumantscha ch'è en contact con las personas responsablas da l'institut ideas creativas per in diever alternativ economicamain raschunaivel da l'areal a Ftan. Emprimas ideas sco il center d'innovaziun en connex cun il project d'ina rait da fibras da vaider «Mia Engiadina» u curs da maister per professiuns artisanalas fitg specialisadas èn empermettentas. La Lia Rumantscha è persvasa ch'il chantun Grischun sto giugar ina rolla impurtanta cura ch'i va en in proxim pass per sviluppar d'ideas innovativas concepts e projects da pilot.